

CANTU COSTAT S'EUROPA

Sas chistiones políticas e mescamente econòmicas de custos ùrtimos tempos ant postu in anneu e ispantadu sos italianos. Pro s'opositzione su problema de prus importu fiat a che bogare a Berlusconi pessende chi in custa manera s'aficu e s'isetu de S'Europa e de totus pro s'Itàlia esseret bastadu, belle pro maghia, a pònnere sas cosas a postu.

Su Presidente Napolitano, pissighidu o nono dae sa Merkel, at cumbintu su Cavaliere a fàghere unu passu in dae segus e a si dimitere.

Semper su Presidente at finas numenadu Mario Monti senadore a bida amaniende su terrinu pro lu numenare a pustis Presidente de su cunsizu.

In prus su chi issu at a balanzare comente senadore, l'at permitidu de dare su bonu assempru pro su risanamentu econòmicu de sa nazione, rinunziende a sa paga de Presidente de su cunsizu.

E gasi cun unu *spread* chi oramai non si podiat prus sustènnere, cun sas dimissiones de Berlusconi e cun Monti senadore a bida, Napolitano at tancadu su chircu e postu su Professore a capu de su Guvernu.

Monti depet rispondere a totus sos partidos polìticos ma non rispondet a perunu eletore, ca perunu eletore at postu a su guvernu ne a issu ne a perunu de sos ministros suos.

Pd e Pdl ant dadu ampra manu a Napolitano e si pagu balent sos pàrreres de Di Pietro o de sa Lega, pessadebos cantu contat su meu.

Semper e cando eo creo chi ischinde comente si diat èssere cumportadu su Prof. Monti, s'Itàlia dei Valori e sa Lega ant pessadu chi sos italianos ant a èssere istados comente si siat iscuntentos, e chi s'opositzione issoro, chi no at àpidu pòdidu a cada manera firmare cuss'àndala, aiat àpidu però fatu balanzare aprètziu e cunsensos ùtiles in sa campanna elettorale imbeniente.

In totu custa chistione apo apretziadu meda su sèberu de s'ex Presidente de Confagricoltura Federico Vecchioni chi, dadu oramai pro seguru comente Ministru de sa Massaria, no at fatu nudda pro lu diventare, antzis.

Eo a Vecchioni belle belle no lu connoschia cando, pagu prus o mancu a 35 annos est diventadu Presidente Natzionale de Confagricoltura. L'apo botadu ca mi l'aint cunsizadu unos cantos amigos! Apo traballadu cun issu comente presidente regionale e comente cumponente de su direttivu natzionale pro totu su tempus chi issu est abarradu presidente. Gasi apo imparadu die pro die a l'apretziare. In custa manera est nàschidu un'aprètziu e finas una amighèntzia manna chi Vecchioni no at petzi pro mene ma finas pro sa terra mea: sa Sardinna. Custu, dae Sardista beru, mi lu faghet apretziare galu de prus!

Gasi Federico, cun sa abistesa chi li pertenet, non s'est amesturadu cun unu guvernu chi, a bandas de sas decraratziones pùblicas, pesso chi no at a durare meda. Zustu su tempus de carrigare de impòsitos sos italianos apaghiende sa Merkel e torrende su Paisu a sos chi ant a èssere elèghidos a pustis.

Torramus a Monti! Custu guvernu duncas at deretu tocheddadu a sa cassa cun unu disinnu fatu in pagas dies e fortzis finas pro custu, criticàbile. Difatis no at pessadu chi, pro nàrrere totu sos impòsitos subra sas domos no si podent incassare cun fatzilidade e ne mancu deretos.

Gasi un'azienda agrìcula chi at finas unu fràigu minore ebia no at a pòdere parare fronte a provvedimenti l'imponent de pagare s'ICI, chi in antis de oe non bi fiat, subra custos fràigos e sa rivalutatzione de sos balores catastaes de sos terrinos. Doncas su guvernu at a dèpere traballare meda pro incassare cussu dinare e sa cumpetitividade de cussas aziende, zai moribundas, at a agabare de su totu. Est beru chi Equitalia o chie si siat at a fàghere de totu pro otènnere cussu dinare finas a arribare a sa bèndida a s'asta; ma cantos nd'at a agatare chi las cherent comporare? E ite fine ant a fàghere cussos malefadados de impresàrios? Monti custos problemas non si los at postos!

Non andat menzus a chie at un'apartamentu afitadu, si s'afitevole non pagat unu o duos meses; cunsiderende sa rivalutatzione catastale e duncas s'aumentu de s'ICI, s'Irpef o sa "*cedolare secca*", su chi balanzat in un'annu non bastat non naro a pagare s'abogadu pro che lu bogare a foras ma mancu a illatinare sa domo. Monti custos problemas non si los at postos!

Si unu at terrinos, inue si podet fraigare, ma pro pòdere fraigare cheret a fàghere una lotizatzione chi pro unas cantas resones non si podet fàghere, depet pagare s'ICI comente area inue si podet fraigare e in prus est rivalutada puru. Non podet fraigare e depet finas gastare dinare pro mantènnere su terrinu pulidu. Monti custos problemas non si los at postos!

Custos sunt sos problemas de sos fràigos chi non daent profetu! Ma sas atividades agrìculas, cumertziales, artesanales o industriales ant finas issas sas lanas issoro.

E sa crèschida? Su disinnu est istentande a essire a craru e ant a istentare galu de prus a lu pònnere in pratica e pro comente sunt postas sas cosas no ischimus mancu si l'amus a biere.

Tando, pro no illonghiare tropu, creo chi luego in medas amus a èssere in crisi e pesso chi custa crisi no l'at a torrare a contu a su guvernu una die o s'àtera che l'at a prànghere, finas si tando fortzis Monti non b'at a èssere prus e sas curpas si las ant a ghetare dae in pare in pare sa Destra e sa Sinistra.

Eo non so un'economista, so unu massaju però unas cantas dimandas mi las ponzo lassende àteros cunsideros a chie legghet.

Si s'Itàlia, chi est una de sas natziones chi ant fundadu s'Europa paris cun sa Zermània de sa Merkel e sa Frantza de Sarkozy e chi si no isbàllio est finas sa segunda o sa de tres cuntribuentes ,cras diat nàrrere: "eo un'Europa gosi no la rego, non rego ne un'economia a sa tedesca ne unu addatamentu a sas normas gasi comente mi lu prentedet s'Europa e, duncas non rego mancu unu impòsitu mannu pro si bisu europeu".

Narant chi sas conseguèntzias diant èssere graves meda ma nemos narat cales sunt. Eo pesso chi sas conseguèntzias diant èssere graves mescamente pro sa Zermània e pro sa Frantza chi si diant agatare a tragare a sa sola a s'Ispanna, a sa Grètzia, a s'Irlanda e mescamente a sos paisos, prus pòveros, de s'Est.

E si sos italianos diant detzidere de comporare pro nàrrere prus pagos binos frantzesos e de comporare de mancu veturas tedescas? Eo creo chi sas economias issoro unu pagu diant tzedere.

S'Itàlia semper e cando est una nazione industrializada, at un'indùstria turistica de importu e unu made in Italy fentomadu in totu su mundu, dae s'alimentare a sa moda. Cun unu guvernu prus corimodde e cun prus gana de traballare chi de seguru bi diat àere si finas s'impresàriu diat pòdere gosare de su profetu chi produit, eo credo chi si la diat isfrancare galu.

Ma creo finas chi, fortzis, petzi su de lu menetare diat fàghere falare tzertos preigadores dae sa barandilla a pede in terra.